

威新中學公教圖書藏書

THE CATHOLIC LIBRARY
SACRED HEART SCHOOL

聖若望集玻穆傳

上海土山灣印書館發行

No. 41

B 66

盛新中學公教團藏書

THE CATHOLIC LIBRARY

SACRED HEART MIDDLE SCHOOL

聖若望集玻穆傳

上海土山灣印書館印行

No 41

1000 10-32

Florianus Bahr. S. J. (魏繼晉 1706-1771)

VITA
S. JOANNIS NEPOMUCENI

3^a editio



南
京
主
教
惠

重
准

天主降生一千九百三十二年

第三版

聖若望泉玻穆傳目錄

| | |
|--------|----|
| 概論 | 一 |
| 誕生 | 三 |
| 幼年 | 四 |
| 晉鐸 | 五 |
| 辭主教尊位 | 五 |
| 爲王后本神父 | 六 |
| 暴君 | 七 |
| 入獄 | 九 |
| 守命抗奸 | 一〇 |
| 受刑 | 一二 |
| 勗衆 | 一三 |
| 殉主 | 一五 |

| | |
|----------|----|
| 榮哀 | 一六 |
| 遺愛 | 一七 |
| 虐王受罰賢后善終 | 一八 |
| 靈跡 | 一九 |
| 列聖品 | 二四 |
| 聖思 | 二八 |
| 禱文 | 三三 |

聖若望臬玻穆傳

遠西耶穌會後學魏繼晉譯

概論

從來國俗民風。化關君后。道基德業。茂自聖賢。故君轍昏明。則世道隨之而隆替。聖遭困阨。則洪綱由是而彌堅。粵稽玻赫彌亞國。西古名邦也。五百年間。明王代出。聖教浸昌。國無災祲之虞。民有淳熙之慶。德以類聚。才以羣增。若嘉種之播於膏腴。行見勃勃芄芄。而莫可遏抑也。迨至後王文則老接位時。背常拂理。縱欲乖方。以權位爲恣肆之媒。玩聖教爲不急之典。暴殄師道之尊。賊虐忠貞之德。不幾如滋稂莠於

沃壤。棄嘉珍於溝壑矣。所以文則老之惡名。不寬於沒世也。西國諡法。上者。如達未爲聖王。次則如撒落滿爲賢王。再次如公斯當定爲大王。庸平之君。不過如其本稱而已。彼文則老者。本稱且不可得。直加以肖其行跡之稱曰。怠王。嗚呼。嗟哉。其亦世道傾圯之候。聖賢勵節之秋耶。然而精金不減於烈燄。絕德益著於摧磨。雖文則老之力行無度。幾欲盡殄善類。而主簡之才。出類之聖。如若望臬玻穆者。令人可欽而可慕也。克仁克勇。不諂不驕。由其愛主之誠。發其忠君之義。每於文則老之攸行。力行諫箴。愷切進陳。與聖若翰保弟斯大之於赫落得王。無異也。獨是聖人旣名若望。何復繫以臬玻穆之稱。夫臬玻穆之義。釋言甘霖。

也。緣昔本國梗頑難化。天主示懲。累年大旱。懇請主教亞達爾白爾多聖人。在青山祈禱。其接近方區。盛霑沛澤。因名其地曰臬玻穆。以誌不忘甘霖之惠。聖人生育於此。後人遂將此名。別之他聖焉。

誕生

迦聖人之父母。志同德合。敬主精純。世俗虛榮。未嘗留戀。因年衰嗣乏。切懇聖母轉求。得子願獻天主。果蒙恩准。竟生聖人。復求聖母爲母。倣宗徒若望之式。因名若望。冀獲聖母特佑也。越數年。聖人病篤。醫治無術。祈求聖母。瞬息立愈。覩此特恩。足徵聖人異日。必將榮主化人。能爲耶穌之愛徒者矣。且誕生時。光同日月。從天射臨室頂。遐邇老幼。

且驚且喜。咸謂聖人將來發越熱愛之火。闡揚聖道。表率人羣。故主特示寵錫。預爲兆顯耳。

幼年

聖人賦性馴良。資秉穎悟。入學甫讀者。輔彌撒經。口誦心維。深悟彌撒真義。實係開人智慧。增人神力。能感人遷善改過。能濟人死候生前。誠乃種種聖寵之源泉也。是以每日上學。必先進堂輔祭。逢主日。並各瞻禮日。大臺前。神父次第舉行彌撒。始終逐一輔之。自晨至午。爲時雖久。而神樂彌增。不知倦怠。及讀格物超性等書。心領神會。一俱精通。淹貫。時各學肄業諸生。聚集考試。聖人拔中首推。學問旣優。德行愈隆。

願爲司鐸。

晉鐸

志向已定。受神品前。避靜一月。苦工齋克。加倍於常。預廓受寵之具。端立化人之基。登神品後。專以講道爲職。具真誠之熱情。吐通透之奧理。如星光燭照。入人深。而感人切。俾冷淡者。熱心。犯罪者。悔改。疑惑者。明達。行善者。更加勇往。老幼男女。獲益良多。未幾而京都變爲修院景像。

辭主教尊位

大主教選入本堂。在國王前講道。彼文則老後雖甚悖。此時接見。

尙尊敬聖人德行。適主教缺出。眾舉聖人嗣位。堅辭致謝。未隨眾意。一則愛人心切。不忍離傳教講道之職任。一則謙退性成。不願受主教大位之光榮。適有哀矜重務。國王王后。會同託理。乃以事關濟貧。正符素志。藉此可使孤獨鰥寡。均沾實惠。且又無礙厥職。顧乃直任不辭也。聖人之談經論道。既能聳人聞聽。儀容踐履。尤足肅人瞻觀。而且勤施樂濟。宜乎耳目之者。嘖嘖呼爲聖人矣。

爲王后本神父

維時王后若亞納。敬信彌深。奉爲本神父。以助神業。后本品格超常。舉止恪謹。廉潔以清心。勤敏以淑身。兼承聖人教益。不啻爐中添炭。

火上添油。誦經默想之規。因性超性之理。偕時並進。既勤於告解。領聖體。復嚴於齋戒苦工。以及哀矜等德。奮樂相循。孳孳弗已。

暴君

乃視文則老之昏慵狂悖。日甚一日。善則嫉之。惡則爲之。而且殘忍居懷。朝臣無罪。不時加刑。百姓微青。竟致殞命。即如庖人炙鷄欠熟。有何大犯。乃以炮烙刑之。意謂爾炙鷄不熟。吾炙爾則熟也。似此凶虐不仁之甚。王后目擊心傷。巽言法語。隨時進諫。援今引古。委婉喻陳。思竭力窮。不足挽王剛愎之行。無已。暗則獻經持齋。祈主開示。明則轉託聖人。乘機諫諍。噫。內助如王后若亞納。可稱賢淑矣。王如信其親切。納

其忠諫。庶幾轉迷途。而進登義路也。其奈反生猜忌。而認正爲邪。以爲后旣不悅我行。厥心所存。或有舍我慕人之意。且觀其告解獨勤。不知有何罪忒。我如何不知。與其問彼。而飾詞以對。孰若詢其本神父。而真情自得。遂召聖人云。王后之隱私。爾必詳悉。因婦人之胸臆。夫主不可不知。即士庶之家。尙當如此。况邦國乎。后若內具不良。變生莫測。豈不所關甚重乎。爾將后之告解心事。詳細陳明。用以寬慰我心。必當厚償爾德。異時。賜爾大主教權位。以及應用之房產財物等。無不快足爾心。在國王以利動之。自爲得計。滿望隨其私願。孰知聖人道義盈懷。聞此悖違重典之語。驚愕異常。勃然色變。正言直責曰。惡。是何言哉。好察人

私。喜聞人過。庸常之人。容或有然。王乃萬乘大君。人爵至尊。何得若卑卑者。出此不肖之計量乎。矧夫告解聖事。乃耶穌親定。聖教中。至要至切之大典。最嚴最密之神工。惟神父聽告解時。身代主權。口代主令。得以審察罪情。定其補贖。過此忘之如遺。焉敢故存胸臆。神工之外。卽本人亦難復道。况敢洩露於他人之前。方主命而干重譴乎。茲不圖來此蔑視主命。悖違聖典之妄語。較之魔誘傷靈。鳩毒害身。殆有甚焉。雖速祛此語。尙覺晚耳。猶欲冀我從之耶。主命不爽。主鑒維嚴。王宜急悟。慎勿再言。

入獄

蓋聖人之論嚴辭確。意欲冀王因是一悟。而文則老聽之。逆耳拂意。羞怒迭生。不惜聖人鐸德神品。竟忘國王道義尊重。立即喝役鎖拿。監禁極深幽獄。絕其飲食。以洩忿恨。聖人外有悅色。內無慍意。甘爲聖教要典。忍辱受侮。謝主允賜此恩。司獄莫審其故。進勸曰。如是苦楚。眞屬難堪。設非順王意旨。何有免脫善術。願三思之。聖人自思本職旣重。身命自輕。答云。粉身碎骨。志所甘也。固自可矣。吐人解罪。罰難道也。萬不可耳。

守命抗奸

數日後。王遣一臣來獄云。王怒已息。前因一朝忿激。冒瀆神父受

苦。原非本意。後悔靡及。但幸神父爲主赦罪。明日潔誠治宴。請赴勿却。其中並無他意。惟聊補前此之愆。用申尊敬之悃耳。言畢。遂釋聖人回家。噫。王之前倨後恭。內含詭詐。聖人寧不知之。當此之際。一惟仰賴主之聖佑。預期籌畫應對。臨時。雖罹羅阱之厄。如居衽席之安。次日進宮。國王格外優禮。宴畢。復邀同入內宮。威利並陳。以備閱覽。欲令觸其目。而轉其心也。預設兩桌於旁。左桌。乃大主教權杖禮衣。以及金銀寶品等物。右桌。乃刀鋸桎梏等刑具。向聖人云。茲者請筵。仍爲王后之事。不。明。食不甘味。寢不安席。此禁地密室間。出爾之口。入我之耳。得釋方寸憂悶。足矣。決不以我之口。再入他人之耳。即在后前。亦不道及。爾其放。

心直吐。切勿固執如前。試看左右兩桌。羅列何物。或領我寵眷。或試我嚴怒。頃刻之間。榮辱攸分。任爾擇焉。聖人坦懷自如。神氣怡然。指寶品桌云。彼何足貪。轉向刑具桌云。此何足懼。神父品職。維主授定。只命在主前。按輕重赦人之罪。不許在人前。因利害洩人之罪。告解者。求主寬免之。聽告解者。代主司理之。茲將獨主知者。使人並知。是告解者。潔己靈魂。能趨永福之路。而聽告解者。敗人顏面。反遭永苦之殃。此事何等關係。安敢曲徇王之悖戾。而褻慢聖事之蹟乎。王縱有殘我肉軀之重刑。萬難奪我金石之神志。

受刑

所言未竟。王即怒令施刑。意其嚴刑莫忍。自必供吐隱衷。而聖人惟呼耶穌瑪利亞聖名。他無一語。要知人能加虐。使肉體痛苦難當。主能加寵。使心神自充和樂。目覩多天神降臨。旋繞安慰。是以聖人容止怡然。王見聖人情景。料難遂意。乃從賢后諫勸。且懼惡名傳布。良心未絕。因復釋之。

勗眾

聖人回堂。密卽延醫療傷。並不微洩受傷之故。亦不指出施害之人。然揣國君之虐。何肯息心於此。必有後患。更厲於前也。聖人時卽蒙主默照。知當致命成功。於是一切神工。倍增黽勉。講道末次。將耶穌升

天前。囑訓宗徒之言。未時不得見我。爲題。向衆云。自今以後。不得再訓爾輩矣。不久天主准我致命。爲保耶穌親立之大典也。聖人因念本國人民。日後將遭凶禍。隨講隨哭。預告將來本國。定遭水旱凶荒。瘟疫天札等天災。外國稱干比戈。興兵篡奪。最可憫者。聖教大遭困阨。聖堂修院。非毀即焚。衆神父。輕則受刑。重則致命。若非天主施仁。聖教定然絕滅。爾等各宜加勉神工。堅心忍守。以俟主命。我從此逝。長謝故人矣。衆人乍聆斯語。面目相覷。不解何故。因思聖教通行本國。由來久矣。而況現屬平安。何至一壞若是。然又細玩聖人之言。從主默示而來。胡敢疑哉。聞此奇凶。人皆憂結愁積。鬱鬱而散。

殉主

當時距京六十里。有聖母堂一座。所供聖像。靈跡極多。從聖教始入本國。延傳至今。而瞻仰尊敬。更盛於初。聖人入世之時。曾以己身奉獻聖母。謝世之前。故至此堂。舉行彌撒。求聖母作主保。賜益神力。能全致命義勇。耶穌升天前一日。聖人回京。國王自宮內窻櫺窺見。頓復日前疑后之心。並憶聖人推諉言詞。羅列胸次。欲罷不能。速傳聖人來前。大發雷霆云。供吐情實。慰我心愁。全爾性命。均有裨益。否則誓不共天。沉溺之禍。行將見矣。聖人知王被魔蠱惑。牢不可破。難與言爭。惟俯首向胸。以手指捫唇。示己堅意畏主。絕不畏人。雖被萬死。不敢稍違聖事。

大典。國王恨怒愈盛。命縛聖人手足。乘夜潛昇。投河淹斃。時天主降生
一千三百八十三年。

榮哀

惟王昏昧自欺。以爲所行祕密。且又禁止外傳。他人胡得知之。不知聖功克享主心。聖跡能彰人目。聖人生也。特降大光以表瑞。其沒也。尤滋多耀以示榮。時見五星圍繞聖屍。光若太陽。星水輝映。蕩漾一色。宛如送殯之像。其河流近通城內。星光一顯。民衆爭先趨睹。王后深居內宮。遙見星光之異。趨至王前云。若大聖跡。係主何意。王知光在波流。將露己惡。不禁心如雷震。愧無容地。惟有默默垂首。三日不朝而已。奇

哉。天主全能。河水洋洋。奔流滾滾。竟使聖軀。既不湮沒。亦不損傷。將及黎明。天神空中讚揚歌唱。水退流洩。聖軀顯露河邊。狀如安臥。並覺奇美香氣。撲人鼻面。涯畔聚觀之眾。驚異非常。喧聲振舉。未識神父之何以若是也。及見官員兵役中。有情不自由。齊聲追悔。悞順虐王。致殘神父。泣望聖人。以愛主愛人之至意。宥其愚懦重大之罪愆。眾人方曉致命情實。痛哭流涕。如喪考妣。恭敬之誠。即若已經列品之聖。親手親足。頌其峻德。讚其剛毅。流連感嘆。久之不忍捨去。內有抱病者。稍就聖屍挨摩。鮮不立愈。一時聖跡。即已屈指莫數。

遺愛

大主教聞之。親率眾神父。迎入大堂。敬治衣衾棺槨。隆禮殮畢。定期安葬。正及起土。見一大箱。平橫地上。啟視其內。滿貯美玉精金。明珠奇寶。見者。徒謂聖人不白占墳地。留價以償。此猶循跡之論。尙未窺其衷曲也。蓋聖人之心。生前愛主愛人。欽主而崇聖堂。訓人事主必兼物獻。故死後。猶以遺物。爲修飾聖堂之用。濟貧慰苦之資。則是大堂之存。而聖人欽崇之心。與之俱存。貧苦者在。而聖人賑濟之心。與之並在也。

虐王受罰賢后善終

以聖人肫摯遠綿之仁愛。較文則老怙終莫改之殘暴。懸絕霄壤。無感乎上主至公之賞罰。有不拘拘然定在身後者焉。在昔本國王祖。

緣於聖而公會有功。隣邦各國推尊爲總王。而子孫繼享斯榮。歷年久矣。迨至文則老王。則於聖而公會。不但無益。而且有害。仍由隣邦各國公議。削去總王權位矣。此生前降罰端倪。曰何足異。獨惜王后知爲自己神工。致使神父損軀傷命。不覺心如芒刺。衷痛難名。復見國事日非。君心益昧。國計民生。害胡底止。苦勸不聽。坐視不忍。遂無意人間。而請聖人爲其主保。轉求天主。早賜離世升天。至後四年。果得如求滿願。向非傾聽神父之訓誨。嚴遵聖教之規誡。其何以獲主允錫。有如斯乎。

靈跡

且聖人葬後三百餘年來。奉爲主保者。不特王后而已。且乃人人

皆然。雖列入聖品之禮儀。教宗尙未施行。然而趨墓拜禱之人。無不蒙其聖澤。瞽者明。聾者聽。病者痊。聖墳竟成神醫。墳土即是良藥。取食輒效。捷如影嚮。故自王公。以至庶人。中心敬慕。不約而同。然非第聖墳如此。即臬·玻·穆·本家。從聖人致命後。因係聖宅。烏敢輕居。將房室改易聖堂。日積月累。風雨摧殘。舊基傾圯。重建壯麗大堂。供奉聖人之像。遠近之人。凡來瞻拜者。有求必應。亦如聖墳無異。嗣後國中災異疊見。先有荒年。繼以瘟疫。誠如聖人預言。毫釐莫爽。惟請聖人做主保地方。幸逢甘雨。咸享豐登。至他樣患難困苦。亦得屢蒙伸救。事關聲名者。真切求之。得其保全。畏受士師冤抑者。哀苦求之。得其平允。密犯國憲。而恐洩

露者。痛悔求之。得其隱蔽。更有應受極刑者。國王之定案。嚴密封固。因本犯立志改過。許願崇敬聖人。其文書潛移默改。啟封時。竟有寬宥字樣。已見多次如斯矣。俘擄之人。遠違故土。無術可施。虔切求之。不覺鎖鍊自開。舉目一觀。竟已安坐本家之中矣。奇哉。聖人功崇德茂。事事翕合主旨。倚主全能。在在盡隨人望。真有不可勝窮者矣。前者曾有先知預言。將有外國異端。篡奪本國。聖教亦遭毀辱。將近臨期。本堂眾神父。聞有悲憫哭聲。晝夜不絕。細查所自。出于聖坎。蓋以至尊聖殿。異端何人。敢於日後侮慢。聖心傷感。雖死猶然不泯。其時有一隣國。教規久廢。已受棄絕通功之罰。並不追悔。擅敢統兵篡位。肆行無忌。逼勒玻赫彌。

亞國人。背叛天主。殺僂神父。燒毀聖堂。雖京都大堂。仍舊存留。但就中分界。下分給與奉教之人。上分自爲異端之用。上分內有聖坎。聖人不容輕褻主堂。故于羣衆聚集時。赫然明現。凜凜神威。光烈射目。義怒凌人。勝於金革之武。惡衆驚惶。手足無措。四散奔逃。屢屢若是。以故異端憎惡聖人。比之他聖尤甚。思欲污毀報復。知聖墓前懸有銀燈一盞。日夜常燃。密行抽油貯水。令其熄滅。維主全能。反加光亮。昔准以水變酒。茲乃以水代油。是亦表示聖功不可磨滅也。聖坎平坦如地。上鋪白玉美石。題刻十字聖號。入堂之人。從旁行走。罔敢慢褻。如或蹂踐其上。罰不旋踵而至。異端之徒。不以爲然。內有一倨傲貴宦。進堂瞻視。漠然弗

顧以爲偶爾踐履。何至遽如人言。彼方舉步駐足。即以有物擊頂。頭昏腦暈。幾至偃仆。急出聖堂。意在掩人耳目。孰想愈蓋愈彰。顛倒錯亂。從右跨馬。不自知覺。力行鞭策。半步不前。棄馬登車。所駕六馬。俱如繩索纏絆。分寸難移。無已。徒步而行。羞慚愧悔。莫可言狀。欲傷聖人貴重。反招旁觀譏誚。前鑒在茲。良足畏矣。但有明悟者。自應不蹈已覆之轍。乃竟又有一庸愚世爵。膽敢足躡聖坟之上。未見卽罰。而嗤無靈應。不知毀慢旣甚。受罰愈重。甫及堂外。家僕蹶趨稟報。公子無恙。霎時跌仆。氣絕。聞信之下。不覺赧痛交集。怨恨填胸。而瘋狂陡起。街市橫衝。竟於轂擊肩摩之地。拔劍亂刺。見者欲阻無術。恐遭其害。而先行戮死。嗟乎。輕

薄一時。父子俱殞。如此。猶謂聖人可侮乎。不可侮乎。事聞新王。當因所懲。而知自新之路。豈意僅有一時畏懼。或禁令作踐。或反其旄倪。未幾而執迷如故。終想毀滅聖坟爲快。因遣親信宿衛。帶健卒四名。掘墓毀屍。冀除重禍。坟有鐵欄圍護。欲掘其坟。先毀其欄。兵役兩人。近向措手。一暈倒立斃。一瘋癲傷命。餘見重罰。戰慄奔逸。倡散流言。謂坟內定有邪術。可用木板圈圍。掩蔽坟面。庶無後患。豈曉聖坟。越經三百餘年。主賜無限寵光於本國。後奉教各國。咸蒙聖人爲其主保。恩施殊深。默佑總王。征討迷君。國家平安。聖教復興。

列聖品

大主教奏請教宗。將聖人致命緣繇。聖跡行實。始末條陳。懇列聖品。頒行天下。教宗本篤第十三位。稽核已實。猶欲一見聖屍新據。益堅衆人之信。因是敬謹啟墓。雖見棺木衣衾筋肉。悉已毀化。而四肢百骸。節序聯貫。完整無缺。此已足徵奇跡。更有異者。口中之舌。鮮亮潤澤。紅活如生。按醫家名論。人屍內必先壞。其外次之。而舌係先壞中。尤易壞者。獨聖人之舌。入地三百四十六年。非但未嘗先朽。亦不稍見損傷。而且永久不壞。天主以聖人之生平。志堅意潔。從不以舌談人過犯。損人名望。惟用其講道揚主。救人靈魂。若爾功勳。天主特顯若爾聖跡。故耳。教宗既已目擊靈奇。遂定日期。乃於諸國稠衆人前行禮。稱曰。爲聖事。

跡禮。首先致命聖人。時天主降生一千七百二十九年。在羅瑪府大堂內。若翰保弟斯大。宗徒若望。二位聖人祭臺中。新立聖若望泉玻穆致命祭臺。永垂崇敬。迨本國慶賀之日。四方瞻禮者。林林總總而來。將聖舌顯露供奉。啟人恭敬之誠。舌卽復發紅嫩色澤。重生津液。其中筋絡血氣貫通。皆能明視。時有一人手指麻木。近前一沾聖舌。霍然立愈。又一人渡河船覆。溺水飄泊多時。因其許願聖人瞻禮日。赴堂慶賀。雖河廣水長。竟卽從容上岸。安泰如常。厥後外教一富翁。耳患一疾。疼痒難忍。諸藥罔效。聞聖人靈異。獻金錢二十五圓。增飾陳設。以表誠敬。其疾果愈。信服倍深。異端者。疑其有意奉教。恥笑訾責。渠乃含羞妄對云。聖

人貪利醫病。余則因疾捨財。奚奉教爲。言終疾發。痛苦如前。側首默聽。錚錚有聲。所獻金錢。悉從耳孔而出。彼卽拊膺扼腕。悔恨交加。自知此疾。必無再痊之望矣。聖人靈奇之跡。筆舌莫能枚舉。以護維聖教。矜全患難。自生時以迄歿後。由鄉邦以達異域者。至今綿綿不絕。初無今昔之分。亦無疆域之限。蓋有一聖人之顯揚。必有一聖人之恩施。主以賞聖人之功德者。卽以賞虔祈聖人者之意願。余故敬述其略。俾觀覽者。以資嚮往崇敬云爾。

聖思

首思聖人所行聽告解。講道理等。一切益人之工。極當讚頌感仰之德。反

遭時君疑忌。怒叱之冤。然其濟世本職。絕不因此稍弛。惟以含忍諸艱。寧死不辭爲備。乃赴聖母堂。懇祈恩佑。蒙主默示終期在邇。並不畏怯潛藏。且卽當眾明宣。爲主將受重苦致命。但不指出施害之人。及其緣故。夫聖人無辜被害。猶然含忍如斯。吾人犯罪作惡。反敢不服責善之言。風聞失敬言詞。究非褻慢大辱。敢卽怨憤難平。口出不遜幾許。妄指他人。不顧真假。亦不慮其人之名傷否。當此失忍之際。卽于教規本職。每亦棄置不守。甚至齋戒誦經。敢亦全不復憶。不思

齋經。乃主前當盡之分。褻慢。乃世人所加之辱。胡可以所怨所懟。直若無與於人。而獨歸於主者然。吁嗟。人之德業衰微。抑何如此之甚耶。偏私無忍之根。及何若是其深耶。吾人欲習含忍之德。應思聖人何能毅忍無辜之害。因其明知世苦。皆由天主而至。是故安受而謝。吾人值患。不知寧耐。以爲其所由來。皆係世人惡意。弗思甚矣。

再思

聖人受苦之故。因司理告解聖事。沐其神化之人。甚多。淪于穢惡者。改過遷善。志于神修者。德業益堅。然所司緘默之職。持守極嚴。故于國君之許。雖隆。欲加之僂。雖重。終不可奪其堅毅之志。深識司鐸品高貴重。代天主位。施行聖事。誠乃天主臺前之案。罪雖至微。斷不可

洩。良非庭見士師之道。可得而比者。足見告解聖事。隱密之不可言也。此乃明訓領斯常生曠典之人。一則極當明告已罪。毫無曲折巧言。悉除悖理之差。報謙承責過之良言。順聽遷善之訓。全遵補贖之命。夫然後可。一則當學謹戒言人過失。露人隱私之惡習。應知損人名譽。若不補還。天主赦罪之恩。決不能得者也。然人習于錯謬之舉。不知爲數。已有幾何矣。俾克領此聖事實益。須知告解之禮。善司以行釋罪之權。善領以邀釋罪之恩也。

思續

聖人被刑之後。勿欲彰君不義之怒。以己諸傷。密行醫療。夜深人靜時。身遭毒害。被投河中。立即淹斃。除奉旨行刑員役外。別無他人知

此。然天主眷其忠僕。乃賜大光倏發。隨有五星。現于水面。益增其榮。又賜聖軀廣行靈異。崇敬彌加。生平讚揚主名。隱人惡行之聖舌。歿後三百四十六年。毫無傷損。至今色澤如新。吾人當于主賜諸難之日。仰法聖人順受苦患之表。伏思主之全知。事無先後。或屬未來。或居幽隱。無不昭然洞鑒。主之全能。事無難易。行莫能拒。止不能延。一是隨其所欲。主之全善。物無靈蠢。莫不愛之。愿人免凶履吉。皆出不能自己之情。主之預眷宰制之道。出人意外。所定所欲。一皆盡善。人雖乍觀拂意。實則大益神形。主之可倚如此。人於主前。尙有何事。可失寧耐之心者乎。至于名譽被損。亦可望主白我之冤。益增大光于

今世。或以永福之榮。酌于身後。夫然。則吾人心志。尙爾卑鄙委靡。究屬何故耶。于此全能至善之主前。切勿灰心失望。須知今世翕合主心。來世厚加真報。

聖若望泉玻穆禱文

啟 天主矜憐我等。

應 基利斯督矜憐我等，

天主矜憐我等。

啟 基利斯督俯聽我等。

應 基利斯督垂允我等。

啟 在天天主父者。

應 矜憐我等。

贖世天主子者。

矜憐我等。

聖神天主者。

矜憐我等。

三位一體天主者。

矜憐我等。

啟聖瑪利亞。

應爲我等祈。

天主聖母。

爲我等祈。

童身之聖童身者。

爲我等祈。

眞福之神。諸聖品者。

爲我等祈。

天主諸聖人聖女者。

爲我等祈。

聖若望泉玻穆。

爲我等祈。

母老胎荒。許愿天主而生者。

爲我等祈。

誕生時。祥光朗照于室頂者。

爲我等祈。

自幼于眞道聖學。最篤愛者。

爲我等祈。

啟切願耶穌瑪利亞之光榮者。

應爲我等祈。

敬主苦難之極誠者。

爲我等祈。

毅然棄世之華耀者。

爲我等祈。

告解中善理靈情者。

爲我等祈。

保全未毀之聲名者。

爲我等祈。

救復已損之令聞者。

爲我等祈。

善醫心志之失寧者。

爲我等祈。

勇捍緘封之聖事者。

爲我等祈。

持公秉義之昭明者。

爲我等祈。

啟安和寧靜之宣通者。

應爲我等祈。

洪宣聖信之金鐸。

爲我等祈。

廣濟孤獨之仁人。

爲我等祈。

慰苦振弱之良師。

爲我等祈。

扶危濟困之慈父。

爲我等祈。

鐸德神品之光榮。

爲我等祈。

承行主旨之天神。

爲我等祈。

勤顧人靈之聖祖。

爲我等祈。

預言未來之先知。

爲我等祈。

啟 宣布福音之宗徒。

應 爲我等祈。

緘封之首先致命。

爲我等祈。

神形並潔之童貞。

爲我等祈。

廣行靈異之恩保。

爲我等祈。

能慰諸患之怙恃。

爲我等祈。

望主垂憐。

主赦我等。

望主垂憐。

主允我等。

於諸凶惡。

主救我等。

於諸惡表。

主救我等。

啟 於諸謗口。

應 主救我等。

於諸名節之玷辱。

主救我等。

於諸讐敵之陰謀。

主救我等。

於告解之犯聖。

主救我等。

於告解之怠惰。

主救我等。

於心情之猶豫。

主救我等。

於神形之危殆。

主救我等。

於永生。

主救我等。

罪人。

求主俯聽我等。

啟
求救我罪。

應
主俯聽我等。

求恕我失。

主俯聽我等。

求賜我等。真全識罪而痛告。

主俯聽我等。

求賜我等。保全於爾之聖愛。

主俯聽我等。

求賜我等。克邀聖若望勳勞之轉達。

主俯聽我等。

求賜我等。身後永福。

主俯聽我等。

天主子者。

求主俯聽我等。

除免世罪天主羔羊者。

主赦我等。

除免世罪天主羔羊者。

主允我等。

除免世罪天主羔羊者。

主憐我等。

啟 基利斯督。俯聽我等。

應 基利斯督。垂允我等。

啟 天主矜憐我等。

應 基利斯督。矜憐我等。

天主矜憐我等。

啟 在天我等父者。云云

應 我等望爾。今日與我。云云

啟 亞物瑪利亞。云云

應 天主聖母瑪利亞。云云

啟 居上主扶祐之下。

應 將覆于天主護翼。

啟 吾既望主。

應 永不負屈。

啟 天主俯聽我之祈禱。

應 而我號聲上徹於主。

請眾同禱。

吾主天主。因聖若望緘默聖事。堅持莫屈。特以致命新冠。榮加聖而公會。懇祈爲彼遺表。及其轉達。俯賜我等。謹口慎舌。寧受萬苦。不致

有累於靈魂。爲我等主。耶穌基利斯督。 亞孟。

全能全善。無始無終者。天主。俯鑒我等卑微之禱。茲因敬爾毅勇致命之忠僕。聖若望臬玻穆。獻爾至尊之前。懇祈爲彼勲勞轉禱。俯賜我等悔恨夙讐。復邀聖寵。恒保不失。悉克神形諸險。慰我憂患。庇我艱困。救我玷名暫恥。免我身後永殃。並求賜我獲享常生之福。吾主天主。乃生乃王。世世。 亞孟。

向聖若望聖舌誦

盛德大能恩保。聖若望臬玻穆。爾乃蒙主特施靈異。保存聖舌。多年不損。一生隨爾默守緘封重職。語宣天主光榮。動則德訓施人。靜則

誦經祈主。從不損人令聞。且嘗護人名節。爲此敬爾聖舌。儼然榮主之美品。讚主之寶標。主以無數靈奇聖跡。增其盛德之榮華。作我緝靈之引導。我今賴爾聖舌洪勳。懇制他人之舌。俾勿損我之名。茲我現遭艱困。懇爾轉求天主。俯賜平安。並懇制我之舌。俾惟揚主光榮。惠人神益。不毀他人之名。謹于言所當言。慎于嘿所當嘿。讚主于今世。共爾享主于無窮。 亞孟。

24

269012

269012

1056